

明史藁

列傳第六十一

光祿大夫 經筵講官明史總裁戶部尚書加七級臣王鴻緒奉

敕編撰

何喬新

彭韶

周經

耿裕

倪岳

閔珪

戴珊

賈俊

何喬新字廷秀江西廣昌人父文淵永樂十六年進士授御史歷按山東四川烏蒙奸民什伽私其知府祿昭妻懼誅告昭反詔發軍討文淵檄止所調軍而白其誣宣德五年用顧佐薦奉敕知温州府居六年治最增俸賜璽書以胡濙薦擢刑部右侍郎出督兩淮鹽課正統三年兩議獄不當與尚書

魏源下獄皆得釋朝議征麓川文淵疏諫曰麓川徼外彈丸地不足討莫若俾雲南守將屯金齒令三司官撫諭之遠人獲更生而朝廷免調兵轉餉策之善者也帝下其議僉謂宜討於是西南騷動僅乃克之而失亡多其冬以疾乞歸景帝卽位起吏部左侍郎尋進尚書佐王直理部事東宮建加太子太保以銓選有私爲御史練綱等所劾帝宥之災異見給事中林聰等劾文淵儉邪左庶子周旋疏言其枉聰等攻益力并劾旋御史曹凱復廷爭之遂與旋俱下獄聰疏有囑內臣語太監興安請帝詰主名聰不敢斥言乃釋文淵命致仕英宗復位削其加官而文淵以前議易儲言父有天下傳之子主者遂入之詔書或傳朝命逮捕遂自經死時喬新已登

景泰五年進士官南京禮部主事奔喪歸里里人故侍郎勘稽嘗受業文淵而與喬新兄弟不協奏文淵死實諸子迫之又逼嫁父所愛妾喬新亦訐稽爲巡撫時嘗薦黃玠且代草易儲疏皆被徵比對簿父妾斷指爲諸郎訟冤獄得少解帝亦以事經赦釋不問已復丁母憂服除改刑部主事歷郎中轄錦衣衛衛卒屢犯法捕治不少貸都指揮袁彬有所囑執不從彬怒使人拮撫無所得由是名大起成化四年遷福建副使浙寇千餘人盜採壽寧銀礦所過剽掠募兵擊擒其魁福寧豪尤氏殺人出入隨兵甲拒捕者三十年福清薛遇時出諸番互市事覺謀作亂皆捕殺之福安寧德銀礦久絕有司責課民多破產喬新以爲言減三之二興化民自洪武初

受牛於官至是猶歲課與租奏免之清流歸化里恃險不共
賦白都御史置歸化縣其民始奉要束遷河南按察使歲犬
饑故事賑貸迄秋止喬新曰止於秋謂秋成可仰也今秋可
但已乎賑至明年麥熟乃止都御史原傑以招撫流民至南
陽引喬新自助項忠驅流民過當民聞傑至竄山谷喬新躬
往招之附籍者六萬餘戶遷湖廣右布政使荊州民苦徭役
驗丁口貧富列爲九等民便之十六年擢右副都御史巡撫
山西邊地軍民每出塞伐木捕獸喬新言此輩苟遇敵必輸
情求生皆賊導也宜毋聽闖出犯者罪守將詔可敵犯塞偕
參將支玉伏兵灰溝營擊斬甚衆進右副都御史歲饑奏免
雜辦及戶口鹽鈔十之四劾僉事尚敬劉源稽獄請勅天下

斷獄官淹半載以上者悉議罪帝稱善亟從之召拜刑部右侍郎山西大饑人相食命往賑活三十餘萬人還流冗十四萬戶還朝會安寧宣撫使楊友欲奪嫡弟播州宣慰使愛爵誣愛有異謀命喬新往勘與巡撫劉璋共白愛誣友奪官安置他府播人遂安孝宗嗣位萬安劉吉等忌喬新剛正出爲南京刑部尚書沿江蘆洲率爲中官占奪託言備進奉費喬新奏還之民初喬新之出中官懷恩不平一日以事詣閣言新君踐阼當用正人胡爲出何公安等默然旣而刑部尚書杜銘罷羣望屬喬新而吉代安爲首輔終忌之久不補弘治改元用王恕薦始召喬新代銘奏言舊制遣官勘事及逮捕必齋精微批文赴所在官司驗視乃行近止用駕帖不符合

設有矯詐誰敢拒之復舊制便帝立報許時吉仇正人頻興大獄喬新率據法直之坐是益憾數撫他事奪俸至二年夏京城大水喬新旣請恤被災者家又慮刑獄失平條上律文當更議者數事吉悉格不行郎中魏紳者喬新素重之薦爲大理丞而御史鄒魯覲遷以喬新薦紳恨之會喬新外家與鄉人訟魯卽誣喬新受賕曲庇吉取中旨下諸人詔獄喬新乃拜疏乞歸頃之窮治無驗魯坐停俸喬新亦許致仕後魯謫知蕭山以殘虐爲仇家矐兩目罪至遣戍而喬新晚節彌厲福建市舶中官死鎮守者分其貲遺三司喬新獨固辭不得輸之於庫楊愛德喬新甚旣家居遣使厚致贈且獻良材可爲櫬者喬新堅却之喬新年十一時侍父京邸修撰周旋

過之喬新方讀通鑑續編旋問曰書法何如綱目對曰

煥降元不書叛張世傑溺海不書死節曹彬包拯之卒不書其官而紀義軒多採怪妄似未有當也旋大驚異比長博綜羣籍聞異書輒借鈔積三萬餘帙皆手較讐著述甚富尤篤好濂洛之學與人寡合氣節友彭韶學問友丘濬而已罷歸後中外多論薦竟不復起十五年卒年七十六江西巡撫林俊爲彭韶及喬新請諡吏部覆從之有旨令上喬新致仕之由給事中吳世忠言喬新奄逝士類咨嗟今追考當日事欲與雪前枉耶抑聖意別有在耶喬新學行政事莫不優忠勤剛介老而彌篤御史魯挾私誣劾一辭不辨恬然退歸杜門著書人事寡接士大夫莫不高其行若必考退身之由疑旌

賢之典則如宋蔣之奇嘗誣奏歐陽修矣胡紘輩嘗誣奏朱熹矣未聞當時人主以一人私情廢萬世公論也事竟寢正德十一年廣昌知縣張傑復以爲言乃贈太子太保子廕明年賜諡文肅喬新五世孫源萬曆初爲刑部右侍郎亦有清節濤舉鄉試第一授安慶府推官到官三日吏白當伏謁監司濤揮蹙曰非我所能卽棄官去

彭韶字鳳儀莆田人天順初進士授刑部主事進員外郎成化二年疏論僉都御史張岐儉邪宜召王竑李秉葉盛忤旨下詔獄給事中毛弘等救之不聽卒輸贖尋遷郎中錦衣指揮周或太后弟也奏乞武強武邑閒田命韶偕御史季琮覆勘韶等周視徑歸上疏自劾曰真定田祖宗來許民墾闢爲

恒產除租賦以勸力農功臣戚里家與國戚休豈當與民爭
尺寸地臣誠不忍奪小民衣食附益貴戚請伏奉使無狀罪
疏入詔以田歸民而責韶等方命復下詔獄言官爭論救得
釋當是時韶與何喬新同官並有重名一時稱何彭遷四川
副使安岳扈氏焚滅劉某家二十一人定遠曹氏殺其兄一
家十二人所司以爲疑獄久不決韶一訊得實咸伏辜進按
察使悉撤境內淫祠王府祭葬舊遣內官公私煩費奏罷之
雲南鎮守太監錢能進金燈擾道路韶劾之不報遷廣東左
布政使中官奉使紛還鎮守顧恒市舶葦簪珠池黃福皆以
進奉爲名所至需求民不勝擾韶先後論奏最後梁芳弟錦
衣鎮撫德以廣東其故鄉歸採禽鳥花木害尤酷韶抗疏極

諫語侵芳芳大怒構於帝帝亦怒命調之貴州二十年擢右副都御史巡撫應天明年正月星變上言彗星示災見於歲暮遂及正旦歲暮者天道之終正旦者歲事之始此天心仁愛欲陛下善始善終也陛下嗣位之初家禮正防微周儉德昭用人慎乃邇年以來進奉貴妃加於嫡后褒寵其家幾與先帝后家埒此正家之道未終也監局內臣數以萬計利源兵柄盡以付之犯法縱奸一切容貸此防微之道未終也四方鎮守中官爭獻珍異動稱勅旨科擾小民此持儉之道未終也六卿並加師保監寺兼領崇階及予告而歸廩食輿夫濫加庸鄙爵賞一輕人誰知勸此用人之道未終也惟陛下慎終如始天下幸甚時方召爲大理卿帝得疏不悅命仍故

官巡撫順天永平二府均大興宛平昌平諸縣徭役効奏鎮
守中官陶弘罪孝宗卽位召爲刑部右侍郎嘉興百戶陳輔
爲亂陷府城大掠遁入太湖遣韶巡視賊已滅乃命兼食都
御史整理鹽法尋進左侍郎韶以商人苦抑配爲定折價額
蠲宿負憫竈戶煎辦徵賠折閱之困繪八圖以獻因條利病
六事悉允行弘治二年秋還朝疏論刑罰失平數事報聞尋
改吏部與尚書王恕甄人才覈功實仕路爲清彗星見上言
宦官太盛不可不亟裁損因請午朝面議大政毋祇具文已
又言濫授官太多乞嚴杜倖門痛爲釐正帝是其言然竟不
能用四年秋代何喬新爲刑部尚書故安遠侯柳景賊敗至
數千兩徵僅十一以其母訴免韶執奏曰昔唐宣宗元舅鄭

光官租不入京兆尹韋澳械其莊吏宣宗欲寬之澳不奉詔
景無元舅之親賊非負租比獨蒙宥除是臣等守法媿於澳
也不從御史彭程以論皇壇器下獄韶疏救因極陳光祿冗
食濫費狀乃命具歲辦數以聞南京衛士犯罪刑部主事郭
珠執而鞫之爲成國公朱儀所劾韶奏珠所守乃故事帝卒
從儀言命自後母擅執荆王見瀟有罪奏上淹旬不下內官
王明苗通高永殺人減死遣戍昌國公張巒建墳踰制役軍
至數萬畿內黠民冒充陵廟戶及勇士旗校輒免徭役致見
民不支流亡日衆韶皆抗疏極論但下所司而已韶蒞部三
年昌言正色秉節無私與王恕及喬新稱三大老而爲貴戚
近習所疾大學士劉吉徐溥亦不喜之韶志不能盡行連章

乞休乃命乘傳歸月廩歲隸如制明年南京地震御史宗彝等言韶喬新強珍謝鐸陳獻章章懋彭程俱宜召用不報又明年卒年六十六溥猶當國僅予諡惠安贈太子少保韶嗜學公暇手不釋書盛有著述正德初林俊言韶諡不副行乞如魏驥吳訥葉盛改諡文事竟不行

周經字伯常刑部尚書瑄子也天順四年進士改庶吉士授檢討成化中歷侍讀中允侍皇太子講文華大訓太子起立拱聽閣臣以爲勞議請太子坐經與諸講官皆不可乃已孝宗立進太常少卿兼侍讀弘治二年擢禮部右侍郎中官請修黃村尼寺奉祀孝穆太后吐魯番貢獅子不由甘肅假道滿剌加浮海至廣東經皆倡僚長爭毀其寺却貢不與通調

吏部尋進左侍郎通政經歷沈祿者張后姑壻也尚書王恕在告中官傳旨擢祿本司參議經言非面承旨又無御札不敢奉詔復與恕疏爭之事雖不能止朝論譴焉靈壽奸民獻地於中官李廣戶部持不得經倡九卿疏爭卒罪獻地者嘗上言外戚家無功求遷無勞乞賞兼齋醮游宴濫費無紀致帑藏殫虛宜大爲撙節近例預備倉積粟多者守令賜誥勅不次遷官遂致剝下干進請如洪武間例悉出官帑平糶毋奪民財考績勿專以積粟爲能至清軍之弊洪熙以前在旗校宣德以後在里胥弊在旗校者版籍猶存若里胥則並版籍而淆亂之宜考故冊洗奸弊災傷民乞省恤惜薪司薪炭約支數年災荒郡縣宜盡與停免四方顏料雜辦亦然此救

民急務也帝多採納之八年文武大臣以災異陳時政經爲具奏草而奏中斥戲樂一事深中帝諱密令中官廉草奏者尚書耿裕曰疏首吏部裕實具草經曰疏草出經手卽有罪罪經世兩賢之明年代葉淇爲戶部尚書時孝宗寬仁而戶部尤奸蠹所萃挾勢行私者不可勝紀少不如意讒毀隨之經悉按祖宗成憲無所顧寬逋緩征裁節冗濫四方告災必覆奏蠲除每委官監稅課入多者與下考苛切之風爲衰奉御趙瑄獻雄縣地爲東宮莊經等劾瑄違制下詔獄而帝復從鎮撫司言遣官勘實經等復爭之曰太祖太宗定制閒田任民開墾若因奸人言而籍之官是土田予奪盡出奸人口小民無以爲生矣旣而勘者及巡撫高銓言閒田止七十頃

悉與民田錯於是從經言仍賦之民治瑄罪中官何鼎劾外戚張鶴齡下獄經疏救之忤旨切責雍王祐檄乞衡州稅課司及衡陽縣河泊所經言不可許帝納之命自今四方課稅王府不得請中官織造者請增給兩浙鹽課二萬引經等言鹽菜佐邊不宜濫給且祖宗朝織染諸局供御有常數若曰取用有加則江南兩浙已例外增造若曰工匠不足則仰食公家不下千餘人所爲何事是知供用未必缺而徒導陛下以勞民傷財之事也帝不從經恐歲以爲常再疏請斷其後乃命歲予五千引先有旨倉場監督內官毋增設至是復資緣先後增遣四人經等皆力爭詔止設總督二人京通監督三人帝從內靈臺請令錦衣撥餘丁百人供灑掃經等諫不

納經曰祖宗設內臺不惟欲知災異亦以防外蔽欺其地至密今一旦增百人將來必有漏洩妄言者帝悟立已之崇王見澤乞河南退灘地二十餘里經言不宜予興王祐杭乞近湖地千三百餘頃經三疏爭之竟不許帝以肅寧諸縣地四百餘頃賜壽寧侯張鶴齡其家人因侵民地三倍且毆民至死下巡撫銓勘報銓言可耕者無幾請仍賦民不許時王府勲戚莊田例畝徵銀三分獨鶴齡奏加徵二分且槩加之沙灘地經抗章執奏命侍郎許進偕太監朱秀覆核經言地已再勘今復遣使徒滋煩擾昔太祖以劉基故減書田賦徵米三合欲使基鄉里子孫世世頌基今興濟篤生皇后作配聖躬正宜恤民減賦俾世世戴德何乃使小民銜怨無已也頃